

յայտնող չկայ, երբ մեր անսահման չարչարանքներին և անվերջ զրկանքների մասին ձայն ու աղաղակ բարձրացնող չկայ: Բայց եթէ այդպիսի անվեհեր և քաջ մարդ պատահի մեր գիւղերում, նա իսկոյն կատաղի թուրքերի հրաշէկ գնդակներին զոհ կդառնայ:

—Ա՛յ, քո սպառնալիքդ թէև թուրքերին վախ պատճառեց, բայց իմացած եղիր, որ այդ բանը մեզ վրայ շատ թանգ պիտի նստի:—Ո՛չ մի բան չի լինի, մայրիկ, ասացի ես. թուրքերի յանդուգն ոտնձգութիւնները պէտք է սանձահարել մի կերպ, ապա թէ ոչ նրանց անվերջ պահանջները կատարել անկարելի է:—«Ա՛խ, որդեակ իմ, դու երեսայ ժամանակից հեռացած լինելով, մոռացել ես շատ բան, թուրքերը վրէժխնդիր ու ոխակալ են, երբևիցէ իրենց վրէժը կլուծեն մեզանից»: Անցան մի երկու տարի, արդարև միշտ տխուր լուրեր և ուշադրաւ նամակներ էի ստանում հայրենի աշխարհի դժբախտ գիւղերից. թէ թուրք բէկերը քանդում են մեր տները, այլ ևս վարելու, ցանելու, հնձելու և ապրելու ոչ մի հնար չունինք, կամ ձեռքի տակից օգնիր մեզ, որ կարողանանք ապրել մի կերպ, կամ որնէ տեղ, մասնաւոր կալուածքում ազատ հող գտիր, որ մենք՝ Հայերս գաղթինք և ազատուենք այս անկուշտ գայլերի սուր-սուր ժանիքներից...: 1900 թ. երեք զաւակներիս հետ մեր գիւղումն էի: Մի օրից յետոյ տեսնեմ, որ մի այլակերպ պառաւ թուրք կին ամեն օր մտնում է մեր տուն, ուտում-խմում է և ապա 30—40 կոպէկ էլ «դիշքիրասին»